

दिनांक 05.07.2025

समय: 18.45 बजे

आकाशवाणी जयपुर-अजमेर

प्रादेशिक समाचार

- प्रधानमंत्री नरेन्द्र मोदी ब्राजील रा रियो डी जेनेरियो मांय ब्रिक्स शिखर सम्मेलन मांय हिस्सो लेवेला।
- केन्द्रीय सहकारिता मंत्री अमित शाह गुजरात रा आणन्द मांय देश रा पैला सहकारी विश्वविद्यालय री नींव धरी।
- मुख्यमंत्री भजनलाल शर्मा कह्यो-गांवां ने गरीबी मुक्त करण री प्रक्रिया चाले-आवण वाळा बगत मांय दस हजार गांवां ने बी.पी.एल. मुक्त बनाया जायेला।
- प्रदेश रा हाड़ौती अंचल मांय भारी बिरखा रो ऑरेंज अलर्ट-सवाईमाधोपुर अर सीकर मांय तेज बिरखा रा समचार।

000

प्रधानमंत्री नरेन्द्र मोदी काले ब्राजील री सरकारी जातरा माथे ब्रासीलिया जा रिया है। आ कोई छह दशकां मांय किणी भारतीय प्रधानमंत्री री पैली द्विपक्षीय जातरा व्हेला। श्री मोदी 6 अर 7 जुलाई ने रियो डि जेनेरियो मांय व्हे रह्या शिखर सम्मेलन मांय हिस्सो लेवेला। वे शिखर सम्मेलन ऊं अलग ब्राजील रा राष्ट्रपति लुइज इनासियो लूला दा सिल्वा अर दूजा नेतावां सागे मीटिंग करेला। इण ऊं पैला प्रधानमंत्री आज अर्जेटीना री राजधानी ब्यूनस आयर्स पूग्या। पांच देशां री वा री जातरा रा तीजा चरण मांय श्री मोदी ग्लोबल साउथ रे साथे भारत रा जुड़ाव ने मजबूत कर रिया है। प्रधानमंत्री नामीबिया री यात्रा ई करेला। आ देशां री जातरा ऊं कार्यनीतिक साझेदारी ने और मजबूत करण अर मदद रा नुवां रस्ता खुलण री आस है।

000

केन्द्रीय गृह अर सहकारिता मंत्री अमित शाह आज गुजरात रा आणंद मांय देश रा पैला सहकारी विश्वविद्यालय री नींव धरी। इण ने त्रिभुवन सहकारी विश्वविद्यालय नाम दीरीज्यो है। ई मौके श्री शाह कह्यो के ओ विश्वविद्यालय को-आपरेटिव हलका मांय नीति बणावण, डेटा विश्लेषण, सहकारी विकास रणनीति रा काम अर शोध करेला।

.....
कार्यक्रम रे दौरान, श्री शाह सहकारिता मंत्रालय अर एनसीईआरटी री मदद ऊं को-आपरेटिव रा बारा मांय स्कूली पढेसरा सारु तैयार करी ज्या एक खास मॉड्यूल रो ई अनावरण कर्यो। श्री शाह कहा के लारला चार साला मांय सहकारिता मंत्रालय 60 पहल करी है। वणा कह्यो के सहकारिता आंदोलन ऊं कोई 40 लाख कार्यकर्ता जुड़ चुक्या है। अठिने अंतर्राष्ट्रीय सहकारिता दिवस माथे आज जयपुर मांय राज्य थर रो कार्यक्रम व्ह्यो। राजस्थान सहकारी शिक्षा अर प्रबंध संस्थान-राइसेम मांय व्ह्या ई आयोजन मांय सहकारिता महकमा रा कार्मिका ई हलका री चुनौतियां अर आस माथे चर्चा करी।

000

लोकसभा अध्यक्ष ओम बिरला चिकित्सा शिक्षा, अनुसंधान मांय वैश्विक मदद माथे जोर दियो है। वणा भारत रा चिकित्सा माहौल ने अंतर्राष्ट्रीय साझेदारी ऊं नुवो आयाम देवण री बात कही। श्री बिरला आज नुवी दिल्ली मांय इनोवेटिव फिजिशियन फोरम रा 7 वां सालाना अंतर्राष्ट्रीय सम्मेलन रा उद्घाटन जळसा मांय बोल रह्या हा।

.....

सम्मेलन रो मकसद आंतरिक चिकित्सा रा भविष्य माथे चर्चा करणो है। इण मांय भारत, नेपाल, श्रीलंका, मलेशिया अर ब्रिटेन रा डॉक्टर अर शोधकर्ता हिस्सो ले रह्या है।

000

केन्द्रीय मंत्री भूपेंद्र यादव कह्यो है के **एक देश—एक चुनाव** री मार्फत लोकतंत्र ने बत्ती असरदार बनायो जा सके है। श्री यादव आज कोटपूतली—बहरोड़ रा नीमराणा हल्का मांय जनसभा मांय बोल रह्या हा। बावड़ी गांव मांय शहीद शमशेर सिंह री मूरत अनावरण जळसा रे मौके श्री यादव कह्यो के बार—बार चुनाव होवण ऊं विकास रा काम सुचारु नी व्हे सके है। ई कारण एक बार ई चुनाव कामां ने पूरा कर ने जननुमाइन्दा ने चुणया जा सके है।

000

मुख्यमंत्री भजनलाल शर्मा आज बालोतरा अर जोधपुर रो दौरा कर ने पंडित दीनदयाल उपाध्याय अंत्योदय संबल पखवाड़ा रे तैत चाल रह्या शिविरां रो जायजो लियो। ई दौरान मुख्यमंत्री जनसभावां मांय भाषण ई कर्या। मुख्यमंत्री जोधपुर रा शेरगढ़ हलका रा सोईतरा गांव मांय संबल पखवाड़ा रो जायजो लियो। मुख्यमंत्री वृक्ष कुंज रो उद्घाटन कर्यो। मुख्यमंत्री वृक्षारोपण महाअभियान रे तैत ई कुंज मांय महिलावां सात हजार पौधा लगाया है। बालोतरा रा सिवाणा हलका रा पादरु मांय जनसभा मांय बोलता श्री शर्मा पैली री कांग्रेस सरकार माथे फगत घोषणावां करण रो आरोप माण्ड्यो। श्री शर्मा कह्यो के वां री सरकार गरीब कल्याण री योजनावां रो ऐलाण ई नी कर री है बल्कि वां ने धरा माथे उतारण सारु वाजिब बजट ई देय री है। मुख्यमंत्री कह्यो के राज्य मांय पांच हजार गांवां ने गरीबी मुक्त करण री प्रक्रिया चाल री है। आवण वाळा बगत मांय दस हजार गांवां ने बी.पी.एल. मुक्त कर्या जायेला।

मुख्यमंत्री बालोतरा जिला शिक्षा सशक्तिकरण कार्यक्रम री सरुआत करी। ई दौरान सिक्किम रा राज्यपाल ओम माथुर ई मौजूद रिया। पशुपालन मंत्री जोराराम कुमावत अर उद्योग राज्य मंत्री के.के. विश्णोई ई कार्यक्रम मांय शिरकत करी।

000

प्रदेश ने दूध उत्पादन मांय ठावी ठौड़ माथे लावण सारु केई नवाचार कर्या जावे। गौपालन अर पशुपालन मेहकमा कानी ऊं **कृत्रिम गर्भाधान** अर गौवंश री तादाद मांय बढवार सारु **सॉर्टेड सीमन योजना** लागू करी ज्यी है। पशुपालन मंत्री जोराराम कुमावत डेयरी हलका ने काश्तकारां सारु बत्ती फायदेमंद बणावण सारु चौखा मॉडल विकसित करण माथे जोर दियो। श्री कुमावत आज गुजरात रा पालनपुर मांय **महिला प्रशिक्षण शिविर** रा उद्घाटन मौके बोल रिया हा। वणा बतायो के जयपुर, सीकर, भरतपुर अर टोंक जिला रा 48 महिला दुग्ध संघां री सचिवां ने सिखावण दी जायेला। वणा कह्यो के तीन दिन रा ई सिखावण शिविर ऊं महिलावां री कार्य कुशलता बधेला। डेयरी मंत्री कह्यो के ओ हलको महिलावां ने स्वावलंबी बणावण रो मजबूत जरियो साबित व्ह्यो है।

000

राष्ट्रीय महिला आयोग री अध्यक्ष विजया राहटकर आज जोधपुर प्रवास माथे री। वणा सेंट्रल जेळा रो दौरा कर्यो। ई दौरान श्रीमती राहटकर कह्यो के महिलावां रे खिलाफ अपराध रा मामलां मांय पुलिस ने बत्ती संवेदनशील हो र काम करणो चाहिजे, जिण ऊं पीड़ित महिलावां ने न्याय मिल सके। वणा कह्यो के पीड़ित महिलावां री आवाज ने खास तौर ऊं उठावणी चाहिजे। श्रीमती राहटकर केन्द्रीय कारागार मांय महिला कैदियां ऊं बतळ कर ने वां ने हक रे प्रति जागरूक कर्या। महिला आयोग अध्यक्ष पॉक्सो एक्ट रा बारा मांय जाणकारी सारु स्कूल कॉलेजां मांय जागरूकता शिविर लगावण माथे जोर दियो। इण रे साथै ई **एआई सशक्त नारी अभियान** रे तैत आर्टिफिशियल इंटेलीजेंस रे तैत सकारात्मक उपयोग री बात कही।

000

प्रदेश रा तीस जिला मांय आज बिरखा रो अलर्ट है। मौसम मेहकमां मुजब इण मांय कोटा, बूंदी, बारां अर झालावाड़ जिला मांय भारी बिरखा रो ऑरेंज अलर्ट है। वटे ई बाकी रा जिला मांय हलका ऊं मझला दर्जा री बिरखा रो येलो अलर्ट बतायी ज्यो है। भरतपुर अर जयपुर संभाग अर शेखावाटी हलका रा कुछ हलकां मांय आवता 2—3 दिन मझला ऊं तेज अर कटेई—कटेई भारी बिरखा व्हे सके

है। उठिने, दिखणाद राजस्थान रा कुछ हलकां मांय काले ऊं भारी बिरखा री गतिविधियां मांय कमी रा आसार है। ई बीच, आज सवाईमाधोपुर, पाली सीकर अर झुंझुनूं समेत आरे-सारे रा हलका मांय चौखी बिरखा व्ही। म्हाणा सवाईमाधोपुर खबरनवीस बतायो के ज़िला मांय बिरखा रे कारण केई ठौड़ा पाणी भरीजण रा हालात बण्योड़ा है। ज़िला कलेक्टर लोगां ऊं सावचेती बरतण री अरज करी है।

राज्य मांय केई ठौड़ा चौखो पाणी बरसण ऊं छोटा-मोटा बंधा मांय पाणी री आवण बण्योड़ी है। प्रदेश रा 692 बंधा मांय कुल भराव बूता रो 55 फीसदी पाणी आ चुक्यो है। 56 बंधा लबालब है। वटे ई 412 आंशिक भरीज गया है। मॉनसून आवण रे साथै ई प्रदेश मांय मोटा थर माथे पौधरोपण कर्यो जावे। हरियालो राजस्थान अभियान रे तैत न्यारी-न्यारी संस्थावां अर सामाजिक संगठन ई इण मांय सक्रिय भागीदारी निभा रिया है। ई कड़ी मांय जंगळात मेहकमां कानी ऊं रियायती रेट माथे पौधा मुहैया कराया जावे।